

六一山房詩集

序

吾鄉詩家宋明爲盛潯山屬對盤硬語於昌黎西麓清
辭賦治春於杜曲號過江之詩祖管庫行吟推昌谷之
鬼才疏寮健舉四明社長凱歌爭徐渭之豪萬歷相臣
遺筆奪東阿之秀登壇拔幟伯翼披猖滿縣栽花長卿
落拓下逮滄海之際益工汝社之篇砌里善鳴鄮山偕
作遊蹤紀勝孟東野之沈思埋髮書銘屈左徒之哀響
千秋繼軌一藝專門雖非百家兼綜之長已極兩代詞
人之選家兄覺軒先生丹山孕秀多圃探精衍世業之
清芬譽奇童之蚤慧章衣就塾依然景伯之聽弱冠遊

庠允矣吳公之薦伐山自作家有藏書麗澤交資門多

益友遂乃浸淫卷軸如對古人探索幽微遞成新製積

廿年之晷刻不懈稽求擷四部之菁英自相排比韓嬰

詩傳箋解通明

韓詩箋

周官職方源流審諦

周官職方解

海右

繫年之錄別志乘而單行

明州繫年錄

歐陽方鎮之編補姓

名於斜上

唐書方鎮表考證

蘭臺秘籍採典午之亡書

晉書竹略

簡古文拾師春之賸語

竹書紀年拾遺

浙中令長博收吳越以

前

兩浙令長考

甬上詩篇備錄宋元之代

甬上宋元詩略

網羅既富

稿易再三端緒有條什成七八隆隆焉首首焉固足以

該眾能邁往詰也至若把酒論文翦鐙課藝守大家之

範沿沂柳歐擅儷語之長縱橫徐庾一篇脫稿咸詡通
材七歲能詩更推上品空中雷電挾靈氣而回翔劫後
江山助騷心之悲憤同谷杜陵之什老屋飄零河陽潘
岳之愁空牀轉側呼小妻而捧卷寒夜添香借羣季以
飛觴好春病酒出遊海外波濤縱鯨壑之觀作客都中
風雨灑鶯花之淚別有懷抱盡是傷心發爲詠歌遂稱
巨手或粲如麗錦或靜若秋花或脫帽以稱狂或揚旗
而整隊詠史之作高論漢唐閒情之詩弗刪鄭衛青邱
眾體都歸此集之陶鎔赤堇名區可續諸公之壇坫濂
少聞家學殊愧兄風每從請益之餘獲在校讐之列謝

庭裙屐對康樂而彌慙蘇氏文章慕樂城而無集敢以
蕪語綴此弁言將付手民毋嫌目混爲行人先導仿子
雲序序之文傳作者苦心代法秀禪門之懺

同治十一年二月朔同產弟濂謹序

六一山房詩目

卷一 丙午至辛亥

詩五十首 附二首

卷二 壬子癸丑

詩五十三首

卷三 甲寅至丙辰

詩四十五首 附七首

卷四 丁巳至己未

詩六十首

卷五 庚申辛酉

詩六十八首

卷六

壬戌癸亥

詩五十五首

卷七

乙丑至丁卯

詩四十九首 附一首

卷八

戊辰

詩八十二首

卷九

己巳庚午

詩五十四首 附二首

卷十

辛未

詩五十首 附四首

右詩五百六十六首覺軒先生作也先生研究經史學
有本原詩其餘事耳然根柢三唐兼該眾體感時詠史
諸作尤所擅長接迹李何洵無愧色余愛之請刻以問
世先生乃刪其什六七而授之梓人同治十三年九月
同縣蔡鴻鑑識

六一山房詩集卷一

丙午至辛亥

鄞董沛覺軒

丙午

過芍藥泚錢忠介公故第

相國祠堂在悲風捲樹涼大江東去恨流不到錢唐

古意

繁花媚簾影漾漾微波光舊時嬌少女宛轉如我長纖
手理素縑織作君衣裳經以迴文機繡以雙鴛鴦惓惓
念離別道遠孰寄將孤琴匹與歡攬鏡空自傷

二

薄暮登高樓高樓杳無伴下見江水流隨風自舒卷江
行不知遠客行不知返日落瀟湘煙孤舟已愁晚勞燕
東西飛音書一何緩壓鬢珊瑚釵昨夜兩頭斷

平陵東

有序

古樂府有平陵東一篇哀翟太守作也余謂西
漢之季幾人稱帝幾人稱王若不以成敗論則
統莫正於數月之孺子而佐孺子以起兵者平
陵人方望也哀其事諒其心卽樂府舊題作詩
以表之

平陵東太守門人哀義公平陵東我弔方望之孤忠方

望平陵人西州尊爲賓長安不能召天水不能臣漸臺
傳首新莽死平林下江擁更始更始劉宗非故君王郎
公孫何論矣帝在定安二十年孺子其王吾事旃臨涇
草草謀興復隻手關中成一局豈不知蕭王奄起大河
北天命真人脊有德豈不知南陽濟濟附鱗翼四七星
垣拱辰極故君尙在一綫存草莽微臣敢惜力臣不惜
力臣心癡天之所廢不可支丞相李松作封豕君臣駢
首死東市望雖死望不負孺子望不負孺子望不負高
帝如何平陵東不哀方望哀翟義

丁未

送友人

分袂河梁此別遙
挽留不住水迢迢
夕陽西下君東去
影已先人度過橋

隴頭歌辭

隴山嵯峨隴水鳴咽
萬命當危鼓慘弦絕

二

馳驚擊賊馬病日黑
馬病路多日黑奈何

哭曹丈漁橋

噉

一赴修文召儒生作鬼雄
浮身餘短劍浪跡歎飄蓬
筆墨叢殘後聲名黨錮中
黃泉陳范在揮淚灑秋風

近聞

蔥嶺迢迢瘴霧低近聞大將拜安西

時新疆有警
朝命布彥泰爲定

西將

關門重鎰醒魚眼驛道飛符送馬蹏戈壁巉巖催

警箭幕庭荒迥待春犁煌煌開惑

高宗論頌與諸軍作指迷

二

天外無緣炤覆盆伊州幕府將權尊清淮早制庚辰鎖
荒土能開戊己屯萬里戍邊唐赤子千年立國漢烏孫
氍毹紅柳師行路好遣春風度玉門

三

飛報

綸音下禁闈近臣拜

命賜寒衣金人不敢銷林邑鐵甲何能破樹機雪凍陰
山蘇武節星纏隴右魏公旂健兒感激

天恩重指日鷹揚大合圍

四

八載功勳一旦收謂張格長威勇公楊昭武侯遇春當
爾之變長齡果勇侯芳

日稟

神籌金山月落擒車鼻玉水冰寒破尉頭屬國名王畱
侍子漢家都護錫通侯東陽沃雪尋常事看置關西六

八邨

戊申

送盧星輝

友燦

之杭州

青天何高高，白日照梓里。丈夫意氣中，貧賤有知己。念我同心人，行將渡江水。江水莽東迴，龕豬夾門峙。日落伍相祠，鼙鼓夜不起。願子一葦杭，安穩道如砥。

二

秋風飄然來，肅肅鴻雁翔。木葉疏以落，遊子登河梁。俯視流水清，仰視明月光。明月照我帷，亦照君衣裳。長空一片雲，吹落君之旁。如何望雲思，渺渺天一方。

三

長亭置杯酒與子話離別亭外孤蛩鳴其聲亦鳴咽我
已心惻快聞之益淒絕對酒殊不歡宛轉託詩筆碧水
君泛鷗青山我捫蝨涼颿八月天秋士竟無褐

四

一日不見子思子如三秋况以行路難天地容孤舟舟
行過西湖湖水皆清流清或如子心濁已如我愁揮手
散萬塵茫茫登海樓飄蓬不轉影身世同蜉蝣

鷹

寒隼碧空飛平原賸落暉風霜憐我瘦雉兔爲誰肥俊

骨秋逾健高心夜未歸九霄雲路近莫更向人依

同舍弟訪高尙宅故址

林鳥溪魚自在閒高風落落有誰攀卻將一卷還鄉集
畱與明州作祖山

同作

董濂 震軒

先生歸去來到今已千載林泉高尙風蕭然絕人外
古樹交枝柯屏山作圖畫下有溪流聲悠悠送天籟
游魚靜不驚蘊荷立如蓋盟此白水心濯纓清可愛
羣流急趨下誰能知勇退西望巖子陵獨坐客星瀨
奉化道中

晴日催孤櫂遙遙見數峯千家惟種麥十里盡栽松高
樹盤秋鶴靈潭吼夕龍山中有真隱不敢笑邨農

哭袁月樓孝廉師

世恆

大江東北流一息達千里平生知我恩轉眼邈如水初
聞公病耗我夢夜不救猶謂公體強皇天豈容死客來
登我堂謂公身逝矣命棹一訪之輕舟岸傍艤登岸步
逡巡高門揭旛紙或恐鄰近訛尙問死誰是轉思公無
鄰公病竟不起入門聞哭聲哭聲膾餘哀哭聲慘不聞
寒燈逼牀裏登牀寒孤幃兩眼淚如洗公死爲昨朝我
來隔日耳悔不早訪公朝夕爲公侍猶使公病睚見我

因公涕嗚呼我負公此生曷能已謁公自此終憶公自此始吾鄉重華胄三袁鼎同時南宗多大儒益深我翹企頗憂晚近來橫波勢難匯公也一振之狂瀾挽頽靡左思胸卓竒崔從貌嚴偉倒弈槌懸風韓文語泣鬼公也一兼之隻手具百體弱冠博子衿峩峩弁有頰屢作錢塘遊江廣縱一輦三十賦成均四十正強仕讀書貢明廷天門近在咫尺吐氣雄萬夫下視掃糠粃而以俳側心紆迴及賤子賤子少習文不肯墮塵眯倚撫星宿空狂口肆張哆公笑矜其愚納之九方軌深入弔渺中談天闢微旨回首十載前流光去如矢先君開講堂盈門

種桃李我受易與詩公遣子若弟兩世稱通家年少重

知己

時與公弟世濟公子順則同學

是時公數來到門色先喜夙知道

範尊瞻依恐無似聆公月旦評嘉與及駑駘謂此甯馨
兒頗見具根柢先君笑謂公賊恩古所鄙行當遣趙商
來事鄭北海濶以詩書華甘白受和采嗚呼言在衷蒼
天理無改如何狂飆飛寒聲落羣卉痛矣喬木摧無父
竟何恃公來弔孤兒見我顙有泚相顧各失聲悽悽寫
哀誄我以先君言追隨公杖履惠我真無私傾篋而倒
筐忠宣解麥舟子敬贈困米一以公視之奚讓古人美
壓屋孤月沈迎門朔風颭父死乃有公我生尙無悔巖

巖東嶽峯行遠道在邇一旦歌其頽夢莫恨殷陸青天
苦無階黃泉苦無淚我來弔公魂歌聲變商徵公生我
乃貧修脯不成禮公死我何依有首向誰詣願以我夢
魂索公舊容止空山無片雲鬼語叩冰齒日落天堂堂
湖波斷沙尾

已酉

出門

梧桐一葉落古樹皆成秋出門百日期如懷千歲憂理
我安道琴添我平仲裘檢視囊篋中催僕登行舟寒蛩
織籬落獨雁悽汀洲顧此百端集黯黯生離愁

二

再拜辭高堂高堂病在牀低言囑諸弟湯藥須親嘗有
妹年及笄未嫁依母旁聲聲問阿兄何時歸故鄉去時
叢桂開葉底凝秋霜來時嶺上梅料有南枝香

是科秋
試改期

九月

三

宿昔談詩書意不慕榮利祇緣親在堂乃作祿養計風
雲無定期辛渭有遭際抗懷古賢人時來不可避而我
風塵中碌碌困征騎翹首天門高初願渺難慰

曹娥江晚渡

冥冥天已秋冉冉月將起泛泛木蘭艫悠悠渡江水渺
渺行役心慘慘愁未已寄我平安書明可到故里上寬
慈母懷慎勿念遊子

山陰道中

一棹山陰去疏林正早秋江湖餘短夢風雨且孤舟應
接知無暇飄零不自由茫茫千里雁齊下荻蘆洲

西陵懷古

未卜黃龍飲空聞赤帝來江潮三日靜軍府六家開餉
竭兵難守官輕事可哀錢唐波咫尺西渡尙徘徊

錢唐江觀潮行

錢江三折出海門英奇磅礴相吐吞潮來逆向江流奔
健如萬馬追風輪風輪百里一呼吸萬馬嘶空作人立
陽侯楮楮攔潮入江神迎之敢長揖時維八月天正秋
四山不動風颼颼日皇東升萬態露潮頭隱起一綫流
潮頭一綫平如畫潮神擁潮尙無力須臾浪蹴千朵花
道旁觀者各屏息衝津蹈壁隨江隈勢險能折潮頭回
憑空擲下泰山頂遍地但作驚天雷雷聲轟轟聒人耳
太子深宮病能起屏絕萬籟無一聞金聲不鳴鼓聲死
蘆花滾滾寒雲飛江流欲東潮欲西兩險相薄益摩盪
金光閃爍魚鱗隄貝也種也驅白馬層冰積巖雪積瓦

霎時映入朝暎紅龕山不青赭山赭迎潮水手船如龍
飄檣矗立天半空渾渾沌沌不可制是何神力威且雄
隄防歲費大官築孰遏其鋒折其角臨安錢王十萬鏃
西陵匹婦一股肉武進黃生兩首詩空前絕後誰繼之
我乞枚叔筆一枝冥搜刻畫天地奇

鄂王墓下作

河山恢復寸黃金北望中原遺恨深若待功成始烹狗
英雄泉下亦甘心

題屠甫南

宗襄

望雲圖

望親不得見想像或見之生別已慘然現在親死時城

北屠君頭半白六十年華如過客終身猶作孺慕誠欲
以生魂追死魄死者吾父生者身酸風冷雨常苦辛吾
身雖生不如死吾見吾親餘此紙朝登太行山白雲依
依山之間以目望親不可見魄與魂通隔一綫以目望
親不見親以目望雲如望親望雲猶有雲斷時望親之
心無絕期望親如有吾親在耿耿虛靈叩眞宰題君之
圖益我悲我作孤兒已十載

登龍山絕頂望海

投足雲邊路豪情本少雙迴峯盤故寨環帶視長江風
起潛龍窟星羅貢鯽邦晚歸松月白驚吠隔花堦

庚戌

人日飲楊司馬

存之

小紅書屋

天地留孤跡江山話舊因
一年初作客七日又爲人
岸草煙籠細園花雨釀春
征帆高不挂何處是行塵

送李遵陸明經

鴻

之和闕八十韻

李子將西行腰佩刀雙鐐
醉我鸚鵡杯招我歌吳歛
我生不出門熟覽西域圖
爲汝縷縷陳汝莫心危快
丈夫志四方萬里真區區
出彼玉門關經彼伊吾盧
伊吾今哈密西域稱通衢
南行過注賓北行入稽胡
天山互其中山高逾銀鋸
山中何所有青銅及碧璫
其樹周榆梓

其獸走鹿麋其水涵鮪鯢其林巢鷓鴣山前大戈壁行
客皆赳赳手如升木猿足如穿藤鼯踰險到闢展交河
橫前途交河明火州西南接危須行行布古爾沈沈龜
茲鄂北望賽里城而至阿克蘇屯軍八百人隊隊蒼龍
爰登梯向高望鼎立山岨崕後爲烏什城前爲漢莎車
右循烏蘭河疏勒環重關莎車更南渡玉河涵冰壺始
入于闐都叢山多夔魑回疆周萬里比屋蒙斃回莊
領千數伯克司城符其男連腮鬚其女顏如嫫政令同
景教厥祖生唐初王曰派罕巴國在西洋隅造經三十
篇傳世二十餘嗣孫瑪墨特東遷開穹廬轉眼入瓦剌

駢首投羅罕幽囚瑪罕木墾地輸庸租

高宗蕩衛拉乃兄名尼都釋歸長舊部資以千金旌厥
弟官伊犁錦馬青霞繻乃兄如梟獍厥弟如鼯鼯出彼
樊籠中甘心爲穿窬自號巴圖汗百鬼相哮虺蠢茲三
苗畔中天際唐虞

帝詔靖逆軍

時命雅爾哈善爲靖逆將軍

率彼驃騎趨一戰遽逸賊

萬里賜屬鏤

帝命武毅公

兆將軍惠

賜汝三棱觚衣汝貂襜褕佩汝金鑲

鐔汝其翦長鯨汝其驅封狐前隊排鏤戰後隊張網蕪
中軍大帥旗獵獵椎牲祠轉鬪英奇盤山場困沮淤烏

蘇塹鹿角萬馬皆噴咀亂呼聲栗聲鼙鼓雜以鼓鑿戰

三月餘金創穿骨髑驚動成勇侯

富將軍德

冒雪過廬胸兩

道薄賊壘鈴騎相跳踴逆酋替戾岡西向蔥嶺逋奔騰

索倫騎絡繹大官帑再戰和什珠困賊如籌筴途窮竄

烏狔百口依人餉坦沙震天討軍門函頭顧塵氛誓一

掃醜黨免囚俘攜裝驅白駝犒軍剗黑榆分置東西城

巍巍高垣脰有羊髯其角有龜偏其趺有錢稅騰格有

木貢杞櫟徵糧帕特瑪鑄金索耳爐長感

天皇恩使我遺戎蘇昔事準喝爾昂吉竭澤漁昔事和

阜木分

去

作刀礮牖今天照戎索

仁恩滋枯鱖安享太平福普爾家藏儲庚郵接百駟何
慮山嶽嶇君今行到此善保千金軀揚君赤珊鞭乘君
紫驪駒華風尙儀節逢人躬曲疴此鄉饒金麩可以供
離腰此鄉多霜筩可以防荏苒若得出塞吟書之青雲
膜寄我示一編乘彼西風颭我今歌已終送君行躍躍
躍躍君已行有淚如溝淩霜飈厲鞍轡醉倒清醒酬

烏夜啼

江頭樹烏夜啼寒砧不輟搗落葉驚秋闌空牀一夕夢
遠向遼河西遼河之路千萬里夢郎爲魚妾爲水妾心
如水不斷流安得郎書寄雙鯉

張忠烈公畫像

甯得忠臣像鬚眉萬古新地無奔鬲路天重報韓人賸
水殘山局褰冠博帶身凌煙高閣上肯與鄂襄鄰

讀武侯傳

三代兵農一治國卽治軍陳壽稱良史論古猶未純漢
任武鄉侯西州民大和庶幾伊與周相業高參何卽其
搗秦隴堂堂王者師所遇雖人傑來去一聽之壽也一
孔儒將畧謂非長何以死後身猶能驚宣王

送羅山人

承德歸湖州

旗亭楊柳拂春衣明月當筵酒力微惆悵江南風景異

藕花香裏送君歸

賦得潼關送孫思川嶠之秦中

久不睹干戈潼關險若何長途通太華遠勢遏黃河俯
瞰中原廣雄屯戰士多君行應到此立馬望嵯峨

辛亥

樓烈士歌有序

烈士名鎬字燕甫鄞人道光辛丑八月英吉利
陷甯波憤恨投江死戊申奉

旨入忠義祠

重關開胡兒喜將軍奔烈士死胡兒航海窺中原瀚洲

日落旌旗翻佛郎夜火震西礁輪艤直入蛟門關烈士
宣獻之子孫生平謹愿稱善人異軍蒼頭突然起行歌
躑躅鄞江濱蕃落羣酋悍於虎逆駛雲帆逞號武城頭
倒旗悶鉦鼓將星紛紛墮若雨皇天私汝作男子手按
吳鉤髮上指殺賊不得身死之忠義昭昭有如水鄞江
三折迴海風碧血化爲鯨波紅臣雖布衣踐

王土笑彼食祿徒庸庸斬蛟渡口收骸骨烈士殉名此
奇節千秋俎豆鄉國祠

帝有恩言賜優卹

朝廷養士二百年終須正氣扶坤乾申徒蹈河連蹈海

可死則死餘生捐秋墳鬼哭狐鳴樹佩刀喁喁別人去
願書片石鎮波心烈士當年殉節處丈夫讀書賢聖期
殺身取義當如斯江口烈烈秋風悲素車白馬魂來歸
烈士之烈天鑒之

江行

紅樹青山外飄飄一葉舟夜涼人語靜風定櫓聲柔薄
酒難邀客單衣尙怯秋坐看孤月上歷歷數更籌

泊楓林壩

孤帆遙指越王城到得楓林已二更東舫客聞西舫語
上流水挾下流聲夢回故里家非遠秋入長江月倍明

臥聽蘆花風瑟瑟客途寥落易心驚

旅夜

庭樹秋風漸漸涼故鄉思客客思鄉情將三折之江比
江水猶輸九轉腸

送周參軍

炯

琴劍飄零客錢唐作勝遊一江吳越地兩代帝王州海
月孤城夢湘煙舊國秋送君帆影去惆悵獨登樓

和作

松滋

周

炯

耿庵

同作他鄉客湖山壯此遊歸心隨楚月詩思寄杭州
短笛梅花譜孤帆桂子秋料知君有意懷我仲宣樓

客中聞洪舵鄉明府

起燕

訃寄挽以詩

秋風寒逼人秋雲黯吾屋鄉訊一紙來中夜起燒燭開
函具顛末掩淚不忍讀但聞四壁蟲聲聲助我哭美人
隔秋水宛在天一方思之不可見展轉離愁長離愁尙
不解况乃聞死喪淒然一寸心隨夢歸故鄉

二

生少不識君已識君之名塞裳渡河沛一酌廉泉清臨
淄七萬戶

帝曰保障哉小人猶有母輒賦歸去來歸來杜里門依
舊作寒士靜測予化遷天地渺生死歸來未十年溘焉

竟長逝客中愁予懷思君尙無已

三

我行七月七別君河之干分手登長途有淚不忍彈別後遺我書珍重畱贈言謂當計日歸相與尋古歡君言猶在耳君書猶在案如何我歸來不復與君面爲刊有道碑爲補循吏傳執筆思銘君有淚已如霰

桃花渡

奔流三派繞州城急雨催潮勢不停塵世何嫌江水濁市樓猶帶海風腥西洋琛貝還方集北渡帆檣過客經我亦一舟向東去蓬窗開處數峯青

登鎮海城

初日照重關登臨縱大觀八方金鑑朗萬馬鐵衣寒城
對山容壯天浮海氣寬魚龍猶出沒何以慶安瀾

候濤山懷古

蛟門對峙虎門雄天限中原不再東幾見孫盧操勝算
儘煩譚戚著全功蕭疎樹色秋容淡斑駁苔衣戰血紅
極目滄溟無盡處一聲長嘯海天空

東門婦

驅馬東郭門有婦哀且鳴問婦何爲者夫壻遼東行辭
家八千里命與蛟龍爭高堂逼衰年裊裊無弟兄側聞

海警厲殺戮以爲耕同舟半胡越消息誰死生妾夫去
八月瓶糴糧已傾孤兒擁敗絮手足寒於冰三日得一
餐猶乞鄰母羹望夫豈無石命亦鴻毛輕妾死不足惜
妾家無餘丁我聞思婦言惻惻悲我情揚鞭揖而去掩
淚不忍聽

從軍樂

寰海多賊蹤諸軍慎毋哭且飲金叵羅聽歌從軍曲自
隸綠旗籍俯仰苦不足官吏月散糧粟貴等珠玉昨夜
報出關名在公府贖餉家錢十緡登舟米千斛連艫下
橫洋囊弓且安宿遠聞賊兵來潛避竄空谷客舟焚一

空迴帆轉登陸賊至吾不迎賊去吾不逐談笑歸家門
還勝太平福卻是將軍功歲歲進官祿

六一山房詩集卷一

六一山房詩集卷二 壬子癸丑

鄧董沛覺軒

壬子

有感

江鄉頻歲困風塵寥落村墟萬戶貧羣吏更徵滄海粟
縣官翻費水衡緡三司條例頒新格四野干戈號細巾
自昔明山稱樂土龔黃千古幾傳人

二

府海東南利自饒邇來課引未全銷場征亦是
天家稅壟斷何堪市儈驕勢到已窮憂反噬功原難濟

敢輕微分明兩派潢池水迸作寒江一路潮

三

驛程飛馬去匆匆急羽調兵十郡中金柝夜催山月白
繡旗風捲火雲紅棠陰未戴循南政蔥嶺難收定遠功
聞道

天恩減逋稅

詔書何日到江東

四

南城列戍北城開西渡鳴鉦大府來供億千金煩下吏
科名幾輩出奇才龍頭舊日詞臣策鶴唳中宵戰士哀

寄到征衫情脈脈月明愁上望鄉臺

觀官兵下南鄉

燈火遍江城傳呼夜點兵

朝廷防寇重官吏視民輕海曙樓傳鼓天靈寺作營

舊日

天甯寺時改爲天靈閭閻皆赤子何忍致紛爭

三月二十六日紀事

朝報官軍來暮報官軍來官軍絡繹城門開城外之民
多哭哀聲嗶嗶盡室奔走長者攜兒少者扶母行臺
大官且飲酒朝飲百壺暮一斗朝飲已酣乃遣官軍南
官軍虎視何耽耽暮飲已空乃遣官軍東官軍殺人如

殺蟲嗚呼民何辜嗚呼民何辜駢首投行臺行臺大官
已沈醉明朝更遣官軍東誰道官軍入死地

二

五更出城天光未明中道安營大霧杳冥仰不見日俯
不見人但聞林木碣駭多殺聲官者呼兵船騎並行進
以鼓退以鉏有不率者就爾刑呼聲未已殺聲四起健
兒橫戈晨壓壘當其前者溘焉死眼看此軍無足恃狹
道逼水隘不成列投弓棄刀手無寸鐵前不能進後不
能退官者面面相對魂落膽碎岌岌乎危哉勢將敗

三

勢將敗可奈何跳刀走戟來者益多三日之前官軍來
蕩我室廬貽我災蕩我室廬繫我妻孥沈寃不伸鏤心
刻膚謂官軍其來歟曷不執梃曷不執鋤爾不梃磨爾
頂爾不鋤糜爾顱但見老者壯者少者拍手相招呼沈
沈四面張羅學官軍陷此安往乎前不能進後不能退
顛仆踐踏僵尸滿途莫辨其爲官爲兵爲役夫

四

督將死舟

張副將
蕙

郡判死水

袁通判
建峯

一家陣亡李貳公

琪

之父子孰爲舊令尹

德成

泥首草閒良不忍投之以刀砮

然殞其餘將卒官吏二百人遺尸它籍無完身僅一屍

驅大腹辭參軍

元成

縛縶手足如圈豚渾流湯湯天低

日黃魚不能躍鳥不能翔捲旗束帳拋戈棄裳走不及
者爲國殤此三月中一日事我目擊之心惻傷

五

關城門關城門城門不得關逃軍入城逃民出城其勢
如崩山東街運貨西街停市呼呼噉噉汗出不止東門
盤石西門攔木礮車壓城白晝鬼哭昔日官如虎百姓
如鼠百姓見官低首而愁苦今日百姓如狼官如羊官
見百姓掩面而章皇驅車驅車南城疾趨呼船呼船西
渡挽牽移糧慈谿移營東關官不得寐吏不得餐僅一

提軍一太守一縣官面面相對支絀艱難使我聞之心
膽寒

送仲弟濂之慈谿覓避亂處

事急難緩圖厄運竟成否罡風催閉門十戶九逃徙聞
昔官軍來焦面厲如鬼顧此生命微不直一羊豕近雖
遭敗奔烏從測其旨安知無憤兵報復逞長技鄉郡隔
一城相去等千里訛言日以多宵夢亦驚起鄰縣頗少
安迢迢隔江水行當謀所居淩雜措鹽米離此潢池中
緩急較堪恃汝行勿憚勞吾心聽所止

憶伯姊

嗚呼吾姊家近山良人不歸雛女孱孤燈夜接賊營火
虎口凜凜逃生難官河驛道多烽煙驕陽不豁河冰堅
大風捲幕巢燕死驚魂顛倒愁不眠

憶季弟

洽

嗚呼吾弟客遠方風塵道路阻且長鈴騎一夕過錢唐
家書抵得千金裝吾目望汝不能見夜以吾夢到汝旁
吳山月落天茫茫汝亦東望思故鄉

晤吳蘅塘

德機

每憂不得見今日又逢君曠野飛烽火空山汨亂雲挂
冠聊避世投筆且從軍有志無相強休嫌出處分

贈翁葵園

培元

汝亦稱年少豪情眾所希
果能夷世難何惜蹈危機
對月傾尊酒臨江浣戰衣
奇功收指掌一笑死生微

口號四首呈段鏡湖司馬

光清

迴風頃刻掃邊塵
苗格何須更七旬
雲檄罷飛堇子國
樓船分遣越王津

二

兒童齊唱太平歌
滄海於今晏不波
揮手千金懸賞重
拚頭一擲受恩多

三

縣平門賦籍舊同文草竊翻成將吏勳白戶羣安齊帝
詔黃巾都避漢家軍

四

我曾鈴閣獻書來區畫頻煩謫秀才但願閭閻頌樂社
不須名氏上燕臺

悼殤女蓮生詩

浮雲蔽秋月黯黹無餘光相摧到骨肉使我心惻快生
女不生男門戶尙無託生女聊勝無以慰大母樂大母
憐汝慧膝下時相依汝頗解言語一一親教之那知傾
刻閒遽賦殤女詩汝死亦已矣其柰吾心悲

二

汝母昔來歸嬌婉不耐苦三年井臼操蓬首倩誰語一
從孕汝後大母冀抱孫恐以勞致傷命之毋出門生汝
當夏五一陰得先兆汝母體素孱養汝苦乳少哺汝以
粉餌汝始不復飢汝卽不復飢猶聞含乳啼爾時聞汝
啼吾心悵以觸況汝一命休而聞汝母哭

三

吾身困單弱不耐秋風霜九月偶感寒頽然病在牀汝
母侍吾疾湯藥皆親嘗不暇顧汝飢不暇顧汝涼夜半
聞汝啼抱汝喂汝食炯炯孤燈明汝視不停息吾病漸

已瘳汝睡漸易醒每於三漏時聞汝呱呱鳴汝身汗不止夜起挑長檠汝母擁被池懷汝坐待明獨怪汝死時汝何不復哭使汝汗透裳汝命竟無續

四

釋氏語輪迴斯理殊惘然生兒不成立謂非父子緣汝來果何因汝死向何處一去無消息世人那知故家人環向汝有淚皆盈願汝死已多時猶置大母懷汝叔自塾歸聞信卽哀慟寒風夜打門葬汝猶相送寒風蕭以瑟吾心慘以悽吾心耿不寐汝魂渺何之茫茫天地中浩劫如飈輪曇花一現後誰挽青陽春

東山

東山高不極倒影入吾家斜日無餘思閒吟數落花

癸丑

朱千戶

駿挽歌

潯陽江頭怒潮起飛礮轟轟晨壓壘朱公慷慨烈丈夫
束髮從軍到頭死嗚呼公一卑官耳生不得紆紫綬縮
金章而胡爲乎一死竟如此連環鎖甲血濡紫膛眼如
輪貫流矢千夫之長千人英死是乾坤一男子君不見
狐降鼠竄江上營大帥千里逃殘生逃生不生溘焉死
狂寇已逼金陵城長江天塹可飛渡鐵馬嘶空氣成霧

惟公手揮丈八矛兀立邛山阻衝路勢危力竭身死之
部曲分散無子遺白楊蕭蕭朔風起冷月殘星鬼守尸
睢陽厲鬼能殺賊不死者心死者職至今荒荒老鼠峽
千尸死節處猶聽忠魂長太息

聞警

五載流亡痛已深

王師計日下平林誰書磨盾三千檄但聽寒衣十萬碇
殘驛西風屯卒怨空閨落月美人心銀河未洗兵戈氣
閒對秋宵淚滿襟

蠻花開落紫荆山

賊起事處

舊日潢池此扼關
狡兔尙爲營

窟計亡羊應悔補牢難

叶

招安自古無長策
縱敵愁伊

有汗顏百萬金縉供一擲
兩階猶道格苗頑

三

永安城外雪霏霏
戈甲森嚴大合圍
諸將盡施三面網
九重深望一戎衣
妖星斜指橫江陣
危壁孤懸映日旂
堪恨周防猶未密
亂烏一夕各分飛

四

使相旌旄大將旗

帝敎臣度握雄師
空將朽骨標神駿
幾使遺洩餉佛狸

萬戶荒涼新鬼哭千秋功罪史臣知上方何日誅羣寇
辜負當年賜劔時

五

前鋒遙指桂林城度嶺何須一日程誰遣客軍屯鄂岳
已從閒道下郴衡猛如周泰庸何濟望似姚崇浪得名
惟有峴山碑墮淚斯人早逝柰蒼生

林文忠公至粵賊議縛渠以獻公歿

事遂變

六

三楚縱橫作戰場左聯潭郢右辰常中途莫定哀鴻迹
絕域何來貢蠹香冒索金貂頒僕隸濫收銅馬補戎行

飛符移建南徐節猶自遷延誤此疆

七

羣山夏口鬱崔嵬陣陣寒鴉送夕暉汗馬幾聞神將力
滾龍難禦佛郎機遺民尙作登陴守懦帥多緣乞病歸
青草湖頭青草色碧燐紅燒已全非

八

湖口宵懸萬炬明溫侯猶鼓帳中箏疑從鄰壤乘虛入
卻渡橫波蹈險爭風捲繡旗童子隊賊中有孩兒陣雲屯錦騎
美人兵賊以婦女兩喊助戰自來南北分天塹那可倉皇避敵行

九

拱衛全吳據上流黃州形勝對江州望塵莫去敖曹蓋
橫海應聯越國舟小吏傳宣多赤手異軍特起盡蒼頭
東南生計關天下奚慰焦勞

聖主憂

十

傳報樓船逼小孤九江城內亂如烏聞風已類開門揖
涉險何能裹甲趨諸將拔營俱左次敗兵沿道作先驅
新亭白石焚舟上誰向南燕召寄奴

十一

西來突將本無前休道淮淝壁壘堅采石有橋迎武惠

舒城無廟祀忠宣迷津舸艦黃龍接麗日旌旛白虎懸
忠義儒林難合傳悔將性理說先天

十二

聞道金陵一昔危岐陽龍種已無歸不教徐盛屯濡塢
竟使王琳出合肥半壁江山銷劫火六朝亭館賸餘暉
可憐碧葬全城血猶見忠魂向

闕依將軍祥厚都統霍隆武
率駐防兵闔城畢命

十三

大江滾滾截金焦北府城頭虜氣驕邊郡屯糧惟濟敵
海門懸鎖尙通潮吳宮彫落秋風樹隋苑淒涼夜月橋

一片江都行樂地至今惟有亂啼鴉

十四

指掌河山眇自雄妄援漢制惑愚蒙徒畱優孟衣冠樣
不改臣佗祗結風水族加恩新底簿臺城僭號舊離宮
盛朝典禮煌煌在要使殊方會大同

十五

羣公濟世有經綸冠佩趨朝拜疏陳上策籌邊惟納粟
臨時救火且移薪妖氛漸入中原地嫠室深悲草莽臣
極目蒼生都望治東山小草是何人

梁湖大水歌

梁湖六月多水災我獨胡爲從軍來罡風陣陣挾龍氣
雷鞭一擲山門開連旬急雨萬矢疾貫入危牆勁如鐵
溪流下注河流高巨浪排空滾飛雪樓廬出沒波濤中
城門如橋篙楫通曹娥決口不復合大江故道西混東
居民畏死向舟伏巨舟傾側小舟覆朽棺亂竄入人家
鬼亦無鄉可受哭鷗鷺上樹爭鵲窠樹頭繫纜漁船多
漁船有魚不得買我亦無米愁奈何錢唐破陣載歌舞
樓畝餘糧賸荒土奉檄催租不得遲老農低頭淚如雨
西來寇盜蟠三吳湖嚴接境形勢孤如何腴田化澤國
大兵竟與凶年俱高高者天亦難恃忍使吾民作流徙

我生之後逢百憂重以追呼酷刑死中達中澤啼哀鴻
宰官但說倉儲空平生不識救荒策令我太息富韓公
噫吁嚱令我太息富韓公

贈王劔泉

芬

六載相思夢寐中片帆何幸到江東山林著作千秋業
風雨淒涼一寸衷臣不如人甘放廢君猶知我是英雄
旅窗此夕流連話倚燭長看劔氣紅

同謝方齋侍御

榮埭

何戡民戶部

惟俊

飲酒

庭樹蕭疏感客心華堂六月氣陰森嫩寒入戶衣猶薄
豪飲當筵酒自斟何遜文章無俗骨謝公絲竹有元音

遙知江上峯青處不斷鄰家思婦碁

題義橋驛

越國山川霸氣銷西風吹客過津橋馬頭秋色吳江樹
一帶征旗拂柳條

晚渡錢唐江

千軍屯百舸飛渡下錢唐帆力驅風健燈光射水長夜
深更柝亂秋老戰衣涼遙指江邊路前麾出富陽

戍七里瀧贈徐鐵菴參戎

元鎮

百戰歸來死後身征衫猶帶血痕新臨風幾點英雄淚
半爲君恩半爲親

軍營雜詩

羣灘束流石骨險鐵鎖雙環絙大艦旌旗不動霜天高
飛礮轟轟墮鴉燄此時此境吾在營滿山落葉秋氣清
官軍昨夜退分水檄書早到嚴州驚

二

防江列戍貔貅雄五日一校刀矛弓諸軍赤體狎蛟蜃
酣呼出沒洪濤中萬顚攢水沈到底一躍登舟疾如矢
忽聞使者犒軍來更向前船運芻米

三

長燈插肩刀插腰柵門夜閉銅鈴搖騎馬出營警行列

寒風刮面雙鬢凋銀河沈沈萬動息月黑天低斗柄直
男兒意氣凌八垓欲駕高空奮無翼

嚴子陵釣臺

獨有傷秋客登臨意氣豪長空木葉下終古釣臺高一
去冥鴻隱孤峯病犬號至今嚴下路流水總滔滔

送章采南殿撰

鋈入都

舊是蓬瀛客飄然又入都經綸需內相風雪載前途驢
背詩猶健龍頭望不孤吾

皇方典學何以贊

宸謨

六一山房詩集

卷二

三

二

珍重河梁別臨歧倍愴神
關山多險阻淮海更風塵
良史留君在艱時獨我貧
和章曾有約鄉訊待明春

夜泊銅盆浦

江風捲樹夜颼颼倦枕寒
燈倚佩刀啼鳥一聲驚客夢
碧天無盡月輪高

六一山房詩集卷二